



Los ntawm Thawj Tswj Hwm Thomas S. Monson

“Kuv Yuav Nrog Nraim Koj Tsis Tso Koj Tseg”

Peb Leej Txiv Saum Ntuj Ceeb Tsheej . . . paub tias peb kawm thiab loj hlob thiab haj yam muaj zog thaum peb muaj thiab kov yeej tej kev cov nyom uas peb mus dhau plaws.

Hmo no hauv kuv phau ceev xwm txheej, kuv yuav sau hais tias, “Nov tau yog ib lub tuam rooj sab laj uas tau txhawb nqa kuv lub siab ntau tshaj yav tas los lawm. Txhua yam yeej zoo kawg nkaus thiab los ntawm sab ntsuj plig los tiag.”

Cov kwv tij thiab cov muam, rau lub hlis tas los no thaum peb tab tom sib ntsib hauv lub tuam rooj sab loj no, kuv tus poj niam uas kuv hlob, Frances, pw hauv lub tsev kho mob, vim nws tau ntog pem teb ob peb hnuv ua ntej ntawd. Thaum lub Tsis Hlis Ntuj, tom qab sim zoo mob zoo nkees los ntawm nws txoj kev raug mob ntawd, nws txawm tso lub neej no tseg. Txoj kev xiam nws yog ib qho nyuaj heev. Kuv yuav nws ua kuv tus poj niam hauv lub Tuam Tsev hauv Salt Lake thaum lub Kaum Hli Ntuj hnuv tim 7, 1948. Tag kis yuav

yog hnuv ua koob tsheej nco txog wb hnuv sib yuav 65 xyoo tas los lawm. Nws yog tus uas kuv hlob tshaj plaws hauv lub neej no, tus uas kuv tso siab rau, thiab kuv tus phooj ywg zoo tshaj plaws. Yog kuv hais tias kuv nco nws ces qhov ntawd twb piav tsis tau hais tias kuv nruab siab xav li cas tiag.

Lub rooj sab laj no ua cim qhia txog 50 xyoo tas los lawm thaum Thawj Tswj Hwm David O. McKay. Hauv ntau xyoo no tsis muaj ib zaug twg uas kuv tus khub no tsis tau txhawb nqa kuv. Nws txi ntau tsav ntau yam uas suav tsis txheeb kom kuv thiaj ua tau kuv txoj hauj lwm no. Kuv yeej tsis tau hnov nws yws yws txawm muaj ntau lub sij hawm uas kuv tsis nyob tsev ob peb hnuv mus rau ob peb lim piam es tso nws thiab cov me nyuam nyob lawv xwb. Nws yeej yog ib tug tim tswv lawm tiag.

Kuv xav qhia kuv txoj kev ris txiaj, thiab kuv tsev neeg txoj kev ris txiaj, vim nej sawv daws tau hlob thiab txhawb pab peb txij thaum Frances tso lub neej no tseg. Peb tau txais ntawv los ntawm thoob plaws ntiaj teb no es lawv sau hais tias lawv hwm nws thiab xav qhia kev khuv leej rau peb tsev neeg. Neeg coob heev tau xa paj tuaj rau peb. Peb yeej ua nej tsaug vim nej tau tso nyiaj rau lub Koom Txoos Pob Nyiaj Txhawb Pab cov Tub Txib ua nws npe. Kuv ua tus sawv cev rau cov neeg uas nws tau tso tseg lawm, kuv xav hais ua tsaug rau nej txoj kev ua siab zoo thiab txoj kev hlob.

Qhov uas nplij kuv lub siab tshaj plaws thaum lub caij nyuaj siab no yog kuv zaj lus tim khawv txog Yexus Khetos txoj moo zoo thiab qhov uas kuv paub tias kuv tus me Frances tseem muaj sia nyob. Kuv paub tias wb yuav sib ncaim ib nyuag ntus xwb. Ib tug neeg uas muaj Vajtsv txoj cai khi tej yam hauv ntiaj teb thiab tej yam saum ntuj ceeb tsheej tau muab wb sib khi ua ke hauv Vajtsv lub tsev. Kuv paub hais tias wb yeej yuav rov los sib pom dua thiab yuav tsis sib ncaim ib zaug ntxiv. Qhov kev paub li no yeej txhawb nqa kuv.

Cov kwv tij thiab cov muam, nyaj kuv hais tau hais tias tsis muaj ib tug neeg twg uas tau ua neej nyob uas tsis tau raug kev txom nyem thiab kev nyuaj siab, los yog tsis muaj ib zaug twg hauv tib neeg zaj keeb kwv uas tsis tau muaj kev kub ntxhov thiab kev tu siab.

Thaum twg lub neej no muaj kev nyuaj siab, peb raug ntxias nug hais

tias “Ua cas ho raug kuv?” Tej thaum zoo nkaus li peb pom tsis tau qhov kaj uas nyob tom kawg, zoo nkaus li hmo tsaus ntuj nti ntawd yuav tsis pom lub hnuv tawm tuaj. Peb los poob siab vim peb tsis tau li peb ua npau suav pom thiab peb txoj kev cia siab ploj mus li. Peb xav hais tib yam li hauv phau vaj lug kub npaiv npaum hais tias, “Tsis muaj tshuaj nyob hauv cheeb tсам Nkile-as li los?”¹ Peb xav tias peb nyob peb ib leeg, lub siab tawg nrho, kho siab heev. Peb xav tias peb tej teeb meem tsis zoo kiag cia pib xav tias txhua yam yuav phem xwb. Peb cia li pib ua siab luv rau peb tej teeb meem, tsis nco qab xav tias feem ntau mas lub ntuj ceeb tsheej xav kom peb yuav ua siab ntev.

Tej kev cov nyom uas peb muaj no yeej sim peb txoj kev muaj cuab kav nyiaj mus dhau. Ces peb txhua tus nug tau ib lo lus tseem ceeb heev hais tias: Kuv puas yuav qaug zog, los sis kuv puas yuav mus lawm tom qhov kawg? Ib txhia yuav qaug zog es thiaj tsis muaj cuab kav kov yeej lawv tej kev cov nyom. Kev thev mus txog qhov kawg yog txoj kev nyiaj mus txog thaum tas lub neej no kiag.

Thaum peb xav txog tej yam uas peb sawv daws yuav raug, peb hais tau tib yam li Yauj thaum ub hais, “Neeg lob teeb meem los rau.”² Yauj yog ib tug neeg uas “hwm thiab muab siab npuab Vajtswv” ib tug txiv neej uas “ntshai Vajtswv, thiab tsis ua kev phem kev qias.”³ Nws koj tu tu, vam meej vim nws muaj hmoov, Yauj yuav raug ib txoj kev sim siab uas ua rau leej twg los tau raug kev puas tsuaj. Nws xiam tag nrho nws cov qub txeeg qub teg, cov phooj ywg ntxub nws lawm, nws raug tej kev txom nyem, nws tu siab kawg vim nws xiam nws tsev neeg, lawv yaum kom nws yuav “cem nws tus Vajtswv thiab tuag mus.”⁴ Nws tsis tau ua raws li kev ntxias no thiab nws txawm ua siab loj tshaj tawm hais tias:

“Muaj ib tug nyob saum ntuj ceeb tsheej npaj rawv tuaj kuv tog pab kuv.”⁵

“Kuv paub hais tias muaj ib tug nyob saum ntuj ceeb tsheej.”⁶

Yauj tau rau siab ntseeg. Peb yuav ua tib yam li ntawd thaum peb ntsib tej kev cov nyom hauv peb lub neej?

Thaum twg peb tau ris nra hnyav hauv lub neej no, cia peb nco qab tias twb muaj dua lwm cov neeg uas tau taug tib txoj kev ntawd, lawv tau nyiaj mus dhau, thiab ces tau kov yeej lawm.

Lub Koom Txoos zaj keeb kwm yog li no, lub caij nyooog uas puv txhua lub caij, peb zaj keeb kwm muaj ntau yam xwm uas qhia txog tej teeb meem tiam sis cov neeg ntawd tseem rau siab ntseeg thiab tau muaj kev cia siab. Yog vim li cas? Lawv tau muab Yexus Khetos txoj moo zoo nruab rau hauv plawv lawv lub neej. Twb yog tej ntawd uas yuav pab peb nyiaj mus dhau txhua yam teeb meem uas peb muaj. Peb tseem yuav muaj tej kev cov nyom, tiam sis peb yuav muaj cuab kav ntsib tej ntawd, yuav ua tib zoo kho, thiab thaum kawg yuav kov yeej.

Thaum pw hauv txaj muaj mob muaj nkees, thaum pw es los kua muag hauv peb lub tog hauv ncoo, peb raug tsa los rau saum ntuj ceeb tsheej thiab tau lus cog tseg hais tias: “Kuv yuav nrog nraim koj tsis tso koj tseg.”⁷ Txoj kev nplij siab li ntawd yeej muaj nuj nqi heev.

Thaum kuv taug kev deb thiab thoob plaws ntiaj teb no ua kuv tej hauj lwm hauv lub Koom Txoos, kuv kawm paub ntau yam—ib qho yog qhov uas kuv paub tias kev tu siab thiab kev raug txom nyem yeej los rau txhua leej txhua tus. Kuv suav tsis tau tej kev tu siab thiab kev nyuaj siab uas kuv tau pom thaum kuv ntsib cov neeg uas tab tom muaj kev nyuaj siab, muaj mob muaj nkees, tab tom sib nrauj, muaj ib tug tub los sis ntxhais uas ua loj leeb, los sis raug tej kev rau txim vim lawv tau ua txhaum lawm. Kuv yeej piav tau ntau mus ntxiv, vim muaj teeb meem uas peb suav tsis txheeb uas peb raug tau. Nyuaj heev los hais txog ib qho pib txwv xwb, thaum twg kuv xav

txog tej kev cov nyom, kuv pheej xav txog Tij Laug Brems, uas yog kuv ib tug qhia ntawv hauv Hnuv Caiv Kev Kawm Vaj Lug Kub thaum kuv tseem ua tub hluas. Nws yog ib tug mej zeej uas rau siab ntseeg lub Koom Txoos, uas muaj siab zoo zoo. Nws thiab nws tus poj niam, Sadie, muaj yim leej me nyuam, lawv coob tug muaj hnuv nyooog ib yam li cov me nyuam hauv kuv tsev neeg thiab.

Tom qab kuv yuav Frances ua poj niam thiab tau tsiv ntawm peb pawg ntseeg, wb tau pom Tij Laug thiab Muam Brems thiab lawv tsev neeg thaum twg muaj neeg sib yuav thiab cov ntees tuag, thiab thaum peb pawg ntseeg los sib sau ua ke.

Hauv xyoo 1968, Tij Laug Brems tus poj niam, Sadie, tau tas sim neej. Ob tug ntawm nws cov me nyuam kuj tau tso lub neej no tseg thiab.

Muaj ib hnuv ze li 13 xyoos tas los lawm, Tij Laug Brems tus ntxhais xeeb ntxwv hlob tau hu xov tooj tuaj rau kuv. Nws piav hais tias nws yawg twb nto txog 105 xyoos lawm. Nws hais tias, “Nws nyob hauv ib lub tsev laus me me tiam sis nws ntsib tag nrho nws tsev neeg txhua txhua Hnuv Caiv, nyob no nws tseem qhia txoj moo zoo ib zaj lus qhia.” Nws hais ntxiv, “Hnuv Caiv tas los no Yawg tshaj tawm rau peb tias, ‘Kuv cov me nyuam uas kuv hlub no, kuv yuav tuag lub lim piam no. Nej puas kam hu mus rau Tommy Monson. Nws yuav paub hais tias nws yuav tsum ua li cas.’”

Tag kis yav tsaus ntuj kuv txawm mus ntsib Tij Laug Brems. Kuv tsis tau pom nws ntev los lawm. Kuv nrog nws tham tsis tau, vim nws twb lag ntseg lawm. Kuv los sau tsis tau ntawv mus rau nws, vim nws twb tsis pom kev lawm. Lawv qhia kuv tias nws tsev neeg nrog nws sib txuas lus thaum lawv tuav nws tus ntv tes ntawm sab tes xis thiab maj mam sau ntawv hauv nws xib teg ntawm sab tes laug es sau hais tias leej twg thiaj tuaj xyuas nws. Yuav tsum maj mam sau tej zaj xov li no rau nws. Kuv tau ua li no ces tau tuav nws tus

ntiv tes thiab sau hais tias T-O-M-M-Y M-O-N-S-O-N, uas yog lub npe nws ib txwm hu kuv. Tij Laug Brems zoo siab heev, ces tau tuav kuv ob txhais tes, ces tau muab tso rau saum nws taub hau. Kuv txawm paub tias nws xav tau lub pov thawj hwj ib txoj koob hmoov. Tus neeg uas tau thauj kuv mus rau lub tsev laus tau nrog kuv sib koom tso tes rau saum Tij Laug Brems taub hau thiab tau muab ib txoj koob hmoov rau nws. Tom qab ntawd, nws los kua muag txawm nws tsis pom kev li. Nws muaj kev ris txiaj tuav wb txhais tes. Tab txawm nws tsis tau hnov cov lus ntawm txoj koob hmoov ntawd, peb tau hnov tus Ntsuj Plig, thiab kuv ntseeg hais tias nws tau kev tshoov siab hnov seb peb tau foom koob hmoov li cas. Tus txiv neej zoo no tsis pom kev lawm. Nws tsis hnov lus lawm. Nws tau nyob hauv ib lub tsev tu neeg laus thaum nruab hnub thiab hmo ntuj tib si. Tiam sis qhov uas nws luag nyav thiab hais lus tau raug kuv lub siab. Nws hais tias, “Ua koj tsaug.” “Kuv Leej Txiv Saum Ntuj Ceeb Tsheej tau ua zoo zoo rau kuv.”

Hauv lub lim piam ntawd, ib yam li Tij Laug Brems hais, nws tau tso lub neej no tseg. Nws tsis tau xav txog tej yam uas nws tsis muaj, tiam sis, nws yeej muaj kev ris txiaj rau nws txhua txoj koob hmoov.

Peb Leej Txiv Saum Ntuj Ceeb Tsheej, uas ua rau peb zoo siab, kuj paub tias peb kawm thiab loj hlob thiab haj yam muaj zog thaum peb muaj thiab kov yeej tej kev cov nyom uas peb mus dhau plaws. Peb yuav tsum paub hais tias muaj tej lub sij hawm thaum peb raug kev nyuaj siab kawg, thaum peb yuav tu siab heev, thiab thaum peb yuav raug kev sim siab uas tej zaum peb xav tias peb yuav nyiaj tsis tau. Tiam sis, tej teeb meem ntawd cia peb hloov hlo los ua neeg zoo dua, kho peb lub neej kom ua zoo li Leej Txiv Saum Ntuj Ceeb Tsheej qhia peb, thiab rais los mus ua ib tug neeg txawv yav nram ntej—ua

zoo dua yav tas los lawm, haj yam ua siab ntev, haj yam muaj kev khuv leej, thiab muaj ib zag lus tim khawv uas muaj zog tshaj yav tas los lawm.

Qhov no yuav tsum yog peb lub hom phiaj—muaj tseeb tiag, kom rau siab ntso thiab nyiaj mus dhau, tiam sis kom peb sab ntsuj plig loj hlob tuaj thiab mus dhau plaws qhov kaj thiab qhov kev nyuaj siab. Yog peb tsis muaj tej teeb meem uas peb yuav tau kov yeej thiab tej teeb meem uas peb yuav tau kho, ces peb yuav pheej nyob qhov qub, tsis loj hlob los sis tsis ncav cuag peb lub hom phiaj uas yog txoj sia nyob mus ib txhis. Tus kws sau paj huam sau txog txoj kev xav li no hais tias:

*Tej ntoo zoo tsis loj hlob yooj yim,
Thaum cua yim hlob, ces tsoob ntoo
yim muaj zog.
Thaum lub ntuj nyob deb, ces haj
yam yuav ncav cuag.
Thaum haj yam muaj cua daj cua
dub, ces yus haj yam muaj zog.
Thaum muaj hnub thiab qhov
txias, los nag thiab los daus,
Ces tej ntoo thiab txiv neej, thiaj loj
hlob uas tau cov zoo.⁸*

Tus Xib Hwb nkaus xwb thiaj paub tias peb raug txom nyem, peb raug mob, thiab raug kev nyuaj siab npaum li cas tiag. Nws tib leeg xwb thiaj muab tau kev thaj yeeb nyab xeeb uas kav mus ib txhis rau peb txawm muaj kev kub ntxhov ntawm peb ib puag ncig. Nws tib leeg xwb thiaj chwv tau peb lub siab thaum Nws hais cov lus no:

“Nev cov uas sab sab vim nej ris nra hnyav, nej cia li los cuag kuv, kuv yuav cia nej so.

“Kuv yog tus muaj lub siab dawb siab zoo, nej cia li los kwv kuv tus quab thiab kawm tej uas kuv qhia, nej thiaj yuav tau so.

“Tus quab uas kuv muab rau nej kwv yooj yim kwv, thiab lub nra uas kuv muab rau nej ris, lub ntawd tsis hnyav.”⁹

Txawm yog ib lub caij uas zoo tshaj los sis lub caij uas phem tshaj los xij, Nws tseem nrog peb nyob. Nws tau cov lus hais tias qhov no yeej yuav tsis pauv mus li.

Kuv cov kwv tij thiab cov muam, thov kom peb txoj kev cog lus rau peb Leej Txiv Saum Ntuj Ceeb Tsheej yuav tsis saus thiab su tuaj hauv peb lub neej los sis thaum twg peb muaj teeb meem. Peb yuav tsum tsis txhob raug kev cov nyom peb thiaj yuav nco txog Nws, thiab peb yuav tsum tsis txhob raug yuam kom txo hwj chim peb thiaj muab peb txoj kev ntseeg thiab kev cia siab rau Nws.

Thov kom peb yuav sim kho peb lub neej kom peb nyob ze peb Leej Txiv Saum Ntuj Ceeb Tsheej. Yog yuav ua li no, peb yuav tau thov Nws thiab mloog Nws lus txhua txhua hnub. Peb yeej xav tau Nws txoj kev pab txhua txhua lub caij, txawm yog ib lub caij ntawd kaj nrig los sis los nag los xij peem. Thov kom Nws txoj lus cog tseg yuav yog ib lo lus zoo rau peb hais tias: Kuv yuav nrog nraim koj tsis tso koj tseg.”¹⁰

Kuv hais lus tim khawv tas siab tas ntsws hais tias, Vajtswv muaj sia nyob thiab hlub peb, Nws Tib Leeg Tub tau muaj sia nyob thiab tau tuag theej peb, thiab tias Yexus Khetos txoj moo zoo yog qhov kaj uas ci hauv peb lub neej thaum muaj kev tsaus ntuj nti. Thov kom yuav muaj li no tas mus li, kuv thov los ntawm Yexus Khetos lub npe dawb ceev, amees.

LUS CIM

1. Yelemis 8:22.
2. Yauj 5:7.
3. Yauj 1:1.
4. Yauj 2:9.
5. Yauj 16:19.
6. Yauj 19:25.
7. Yausuas 1:5.
8. Douglas Malloch, “Good Timber,” nyob hauv Sterling W. Sill, *Making the Most of Yourself* (1971), 23.
9. Mathais 11:28–30.
10. Yausuas 1:5.

Kev Qhia rau Peb lub Caij Nyoog

Tej zaj lus qhia hauv pawg Pov Thawj Hwj Mekixedes thiab lub Koom Haum Niam Tsev tej kev sib ntsib thaum hnuv Sunday thib plaub yuav yog tsom ntsoov tej “Kev Qhia rau Peb lub Caij Nyoog.” Txhua zaj lus qhia yus npaj tau los ntawm ib zaj los yog ob peb zaj lus hais los ntawm lub tuam rooj sab laj uas muaj tsis ntev tas los no (saib daim duab nram qab). Ceg txheem ntseeg thiab koog chaw cov thawj tswj hwm xaiv tau tej zaj lus hais uas tsim nyog siv, los yog lawv muab lub luag hauj lwm no so rau cov npis sov los yog ceg ntseeg cov thawj tswj hwm xaiv los tau thiab. Cov thawj coj hais lus txhawb nqa qhov uas cov kwv tij hauv pawg Pov Thawj Hwj Mekixedes thiab cov viv ncaus hauv lub Koom Haum Niam Tsev kawm tib cov lus hais thaum tib hnuv Sunday.

Tsim nyog cov mej zeej uas koom tej kev qhia no thaum hnuv Sunday thib plaub kawm thiab nqa tuaj rau hoob kawm ntawv vaj lug kub tsab ntawv xov xwm uas muaj cov lus hais tom lub tuam rooj sab laj zaum tas los nyob haud.

Tej Tswv Yim rau Kev Npaj ib zaj Lus Qhia los ntawm cov Lus Hais

Thov Vajtsv kom tau tus Vaj Ntsuj Plig Dawb Huv nrog koj nyob thaum koj kawm thiab qhia txog cov lus hais.

Tej zaum koj yuav xav npaj zaj lus qhia siv lwm yam ntaub ntawv xov xwm, tiam sis cov lus uas tau hais tom lub tuam rooj sab laj yog cov lus kawm uas lub koom txoos twb pom zoo rau lawm. Koj lub luag hauj lwm no yog kom pab lwm tus neeg kawm thiab ua neej raws li txoj moo zoo raws li tau qhia tawm hauv lub Koom Txoos lub tuam rooj sab laj uas tau muaj tsis ntev tas los no.

Ke tshab xyuas cov lus hais ke nrhiav kom tau tej ntsiab cai thiab tej lus qhuab qhia uas yuav pab cov kawm zoo tshaj. Tsis tas li ntawd, ua tib zoo nrhiav kom tau tej dab neeg, tej nqes vaj lug kub, thiab tej lus los ntawm cov lus hais uas yuav pab koj qhia tej qhov tseeb no.

Npaj ib tug txheej txheem qhia kev saib yuav ua li cas qhia tej ntsiab cai thiab tej lus qhuab qhia. Xav seb puas nug ib co lus uas yuav pab cov kawm:

- Nrhiav kom tau tej ntsiab cai thiab tej lus qhuab qhia.
- Xav saib tej ntawd lub ntsiab txhais li cas tiag.
- Qhia tawm tej yam uas koj to taub, tej tswv yim, tej yam uas muaj los rau koj, thiab koj tej lus tim khawv txog tej no.
- Qhia saib yuav ua li cas coj tej ntsiab cai thiab tej lus qhuab qhia no los mus siv hauv lawv lub neej.

QHIA LUB HLIS TWG	COV NTAUB NTAWV QHIA THAUM HNUV SUNDAY THIB PLAUB
Kaum Hli Ntuj 2013– Plaub Hlis Ntuj 2014	Tej zaj lus uas tau hais nyob hauv lub tuam rooj sab laj thaum lub Kaum Hli Ntuj xyoo 2013*
Plaub Hlis Ntuj 2014– Kaum Hli Ntuj 2014	Tej zaj lus uas tau hais nyob hauv lub tuam rooj sab laj thaum lub Plaub Hlis Ntuj xyoo 2014*

* *Thaum qhia hnuv Sunday thib plaub hauv lub Plaub Hlis Ntuj thiab Kaum Hli Ntuj, xaiv tau tej zaj ntawm lub rooj sab laj tas los los yog lub rooj sab laj uas nyuam qhuav ua tiam lawm. Cov lus hais no muaj txaum peem ua ntau yam lus nyob rau ntawm conference.lds.org.*



Los ntawm Thawj Tswj Hwm Dieter F. Uchtdorf
Tus Pab Cuam thib Ob hauv Thawj Pawg Thawj Tswj Hwm

Los, Koom Nrog Peb

Txaum yog nej raug xwm txheej dab tsi, txaum nej zaj keeb kwm zoo li cas los, los sis nej zaj lus tim khawv muaj zog npaum li cas los, yeej muaj chaw nyob hauv lub Koom Txoos no.

Muaj ib zaug ib tug txiv neej ua npau suav nws nyob hauv ib chav loj loj es cov neeg sawv cev rau txhua txoj kev teev ntuj thooob plaws lub ntiaj teb tau sib sau ua ke. Nws kawm hais tias muaj ntau yam los ntawm txhua txoj kev teev ntuj uas tsim nyog thiab ntxim nyiam.

Nws ntsib ib nkawm niam txiv uas sawv cev rau Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg thiab nug hais tias, “*Nej yuam nej cov mej zeej ua dab tsi?*”

Lawv teb tias, “*Peb tsis yuam lawv ua dab tsi. Tiam sis tus Tsvv hais kom peb muab txhua yam fij rau nws.*”

Nkawm niam txiv ntawd piav txog kev hu neeg ua hauj lwm hauv lub Koom Txoos, kev mus saib xyuas tom tsev thiab kev mus qhia tom tsev, kev ua tub txib, muaj tsev neeg hmo ua ke, ua hauj lwm hauv lub tuam tsev, kev pab tib neeg, thiab kev txib qhia tej chav kawm.

“*Nej puas them nej cov neeg rau txhua txoj hauj lwm lawv ua?*” tus txiv neej nug nkawd.

Ob tug teb tias, “*Peb tsis them. Lawv ua siab dawb pub kev pab.*”

Nkawd hais ntxiv hais tias, “*Tsis tas li ntawd xwb, txhua rau hli, cov mej zeej siv ob hnub koom los yog saib 10 teev ntawm lub tuam rooj sab laj.*”

“*Yus siv kaum teev mloog tib neeg hais lus tiag!*” tus txiv neej xav tsis thooob.

“*Neb tej kev sib ntsib hauv lub koom txoos txhua hnub caiv nev? Ntev li cas?*”

“*Peb teev, txhua Hnub Caiv!*”

Tus txiv neej hais tias, “*Auj yauj. Cov mej zeej ntawm nej lub koom txoos puas ua li nej hais tiag tiag?*”

“*Lawv ua li ntawd thiab ua ntxiv. Peb tsis tau hais ib yam dab tsi txog tsev neeg zaj keeb kwm, cov camp rau tub hluas ntxhais hluas, kev kawm vaj lug kub, kev kawm ua thawj coj, tej yam ntxim saib ntxim ua rau cov tub hluas ntxhais hluas txhua lub lim tiam, kev kawm vaj lug kub thaum sawv ntxov, kev tu lub tsev koom txoos, thiab kuj muaj tus Tsvv txoj kev cai noj qab haus huv, kev yoo mov pab cov pluag txhua lub hlis, thiab kev them ib feem kaum.*”

Tus txiv neej hais tias, “*Kuv tsis paub. Vim li cas ib tug neeg yuav xav koom ib lub koom txoos zoo li ntawd?*”

Nkawm niam txiv luag nyav thiab hais tias, “*Wb tsuas tos koj nug li ntawd xwb.*”

Vim Li Cas Ib tug Neeg Yuav Xav Koom Ib lub Koom Txoos Zoo Li Ntawd?

Niaj hnub no ntau lub koom txoos nyob thooob plaws lub ntiaj teb muaj cov mej zeej tsawg zuj zus tuaj, Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg yog lub koom txoos uas muaj mej zeej coob zuj zus tuaj sai dua li lwm lub koom txoos—txawm lub koom txoos no me tshaj lwm lub koom txoos—. Thaum lub Cuaj Hlis Ntuj xyoo 2013 lub Koom Txoos muaj 15 phlom tus mej zeej nyob thooob plaws lub ntiaj teb.

Muaj ntau yam uas qhia tias yog vim li cas, tiam sis thov cia kuv qhia nej ob peb yam.

Tus Cawm Seej lub Koom Txoos

Qhov ib, Yexus Khetos Nws tus kheej tau muab lub Koom Txoos no txum tim rov qab los hauv peb lub caij nyoog. Ntawm no nej muaj txoj cai ua tej yam los ntawm Nws lub npe—ua kev cai raus dej kom txais kev zam txim, muab lub txiaj ntsim Vaj Ntsuj Plig Dawb Huv rau lwm tus, thiab khi tej yam hauv lub ntiaj teb thiab saum ntuj ceeb tsheej.¹

Cov uas koom lub Koom Txoos no hlub tus Cawm Seej Yexus Khetos thiab xav nrog Nws mus. Lawv xyiv fab vim lawv paub tias Vajtsvov rov qab hais lus rau tib neeg dua. Thaum lawv txais cov kab ke pov thawj hwj dawb ceev thiab khi lus nrog Vajtsvov,

lawv hnov tau Nws lub hwj chim nyob hauv lawv lub neej.² Thaum lawv nkag hauv lub tuam tsev dawb huv, lawv paub tias lawv nyob hauv Nws xub ntiag. Thaum lawv nyeem cov vaj lug kub dawb huv³ thiab ua raws li Nws cov yaj saub qhia, lawv nyob ze dua rau tus Cawm Seej uas lawv hlub.

Kev Muaj Siab Ntseeg

Ib yam uas qhia yog vim li cas yog qhov uas lub Koom Txoos muab cib fim rau tib neeg ua zoo.

Kev ntseeg Vajtswv yeej yog ib qho zoo, tiam sis tib neeg pheej xav ua tej yam ntau tshaj lawv xav mloog tej zaj lus qhia zoo los yog ua npau suav txog lawv lub tsev nyob saum ntuj.⁴ Lawv xav ua raws li lawv txoj kev ntseeg. Lawv xav sia siv thiab mob siab ua txoj hauj lwm tseem ceeb no.

Thiab yeej muaj li no thaum lawv koom nrog peb—lawv muaj cib fim siv lawv tej txuj ci, txoj kev khuv leej, thiab siv sij hawm ua tej yam zoo. Vim peb tsis them nqi rau cov xib hwb nyob hauv zej zog nyob thoob plaws lub ntiag teb, peb cov mej zeej ua txoj hauj lwm txhawb pab lwm tus lawv tus kheej. Cov thawj coj hu lawv los ntawm kev tshoov siab. Tej lub sij hawm peb pab dawb; tej lub sij hawm lwm tus txib peb ua. Peb xav hais tias tej kev txib peb ua tej yam tsis yog tej lub nra hnyav tiam sis yog cib fim rau peb ua raws li peb tej kev khi lus hais tias peb yuav pab Vajtswv thiab Nws cov me nyuam.

Cov Koob Hmoov uas Muaj Nqi

Qhov peb uas qhia vim li cas tib neeg koom lub Koom Txoos yog qhov uas thaum yus taug kev ua ib tug thwj tim ces ua rau txais tau cov koob hmoov uas muaj nqi.

Peb xav hais tias kev ua kev cai raus dej yog qhov pib ntawm peb txoj kev ua ib tug thwj tim. Qhov uas peb niaj hnub nrog Yexus Khetos taug kev ua rau peb muaj kev kaj siab lug thiab paub lub ntsiab ntawm lub neej no thiab kev xyiv fab heev thiab

txoj kev cawm seej nyob mus ib txhis thaum yav tom ntej.

Cov uas rau siab taug txoj kev no yuav tsis raug ntau yam kev tu siab, thiab kev nyuaj siab ntawm lub neej no.

Cov uas pluag hauv sab ntsuj plig thiab muaj siab ncaj nrhiav tau kev txawj ntse uas muaj nqi heev.

Cov uas nyuaj siab los yog tus siab yuav nrhiav tau kev kho mob.

Cov uas ris kev txhaum hnyav heev yuav nrhiav tau kev zam txim, kev ywj siab, thiab kev so.

Rau cov uas Tawm Mus

Kev nrhiav qhov tseeb tau ua rau ntau plhom tus neeg nrhiav tau Yexus Khetos lub Koom Txoos. Tiam sis, muaj ib txhia uas tawm lub Koom Txoos uas lawv ib txwm nyiam mus.

Tej zaus ua rau yus xav paub, “Yog tias txoj moo zoo yog ib qho zoo heev, ua li cas yuav muaj tib neeg tawm mus?”

Tej lub sij hawm peb xav tias yog vim leej twg ua rau lawv tus siab los yog lawv tub nkeeg los yog ua txhaum. Tiag tiag, tsis yog ib qho yooj yim npaum li ntawd. Tsis muaj ib qho xwb uas qhia tias yog vim li cas txhua tus ua li ntawd.

Rau peb cov mej zeej uas peb hlub ib txhia siv ntau xyoo nug seb lawv puas xav tawm ntawm lub Koom Txoos mus.

Nyob hauv ib lub Koom Txoos uas saib tias kev ywj siab xaiv tseem ceeb heev, nyob hauv lub Koom Txoos uas tau txum tim rov qab los dhau los ntawm ib tug tub hluas uas muaj lus nug thiab nrhiav lus teb, peb saib taus cov uas ua siab ncaj nrhiav qhov tseeb. Tej zaum yuav ua rau peb nyuaj siab thaum lawv txoj kev nrhiav qhov tseeb coj lawv tawm ntawm lub Koom Txoos thiab qhov tseeb uas peb nrhiav tau lawm mus, tiam sis peb saib taus lawv muaj cai teev tiam Vajtswv tus uas Muaj Hwj Chim Tag Nrho raws li lawv lub siab nyiam, ib yam li peb qhia tias peb muaj cai zoo ib yam li ntawd.⁵

Cov Lus Nug uas Tseem Tsis Tau Teb

Ib txhia txhawj heev txog tej lus nug uas tseem tsis tau teb txog tej yam uas tau ua los yog tau hais thaum yav tas los. Peb lees hais tias nyob hauv 200 xyoos ntawm peb lub Koom Txoos zaj keeb kwm—nrog rau tej yam uas tshoov neeg lub siab, tej yam uas ncaj ncees thiab tej yam uas txhawb nqa tib neeg txoj kev ntseeg—muaj tej yam uas tib neeg tau hais thiab ua uas ua rau lwm tus xav paub yog vim li cas.

Tej lub sij hawm peb muaj lus nug tsuas yog vim peb tseem tsis tau muaj tag nrho cov xov xwm thiab peb yuav tsum ua siab ntev me ntsis ntxiv. Thaum peb paub qhov tseeb tag nrho lawm, ces peb yuav to taub tej teeb meem uas peb tsis tau to taub ua ntej ua rau peb txaus siab.

Tej lub sij hawm tib neeg nyias xav txawv nyias txog lub ntsiab ntawm “qhov tseeb”. Ib lo lus nug uas ua rau ib tug ua xyem xyav, tom qab lawv ntsuam xyuas zoo zoo, yuav txhawb lwm tus txoj kev ntseeg.

Qhov Yuam Kev ntawm Tib Neeg Tsis Zoo Tag Nrho

Thiab, kuv hais ncaj, tau muaj tej lub sij hawm thaum mej zeej los yog cov thawj coj nyob hauv lub Koom Txoos twb ua yuam kev. Tej zaum tau muaj tej yam uas lawv hais los yog ua uas tsis yog raws li peb tej ntsiab cai los yog cov lus qhuab qhia.

Nyaj lub Koom Txoos yuav zoo tag nrho tsuas yog tib neeg zoo tag nrho yog cov thawj coj. Vajtswv zoo tag nrho, thiab Nws cov lus qhuab qhia yeej dawb huv. Tiam sis Nws ua Nws tej hauj lwm dhau los ntawm peb—uas yog Nws cov me nyuam tsis zoo tag nrho—thiab tib neeg tsis zoo tag nrho ua yuam kev.

Nyob hauv phab ntawv qhia lub npe ntawm Phau Ntawv Maumoos, peb nyeem hais tias, “Thiab nim no, yog muaj tej kev yuam kev tej ntawd tsuas yog neeg tej kev tsis yog xwb; yog li ntawd, tsis txhob thum tej yam uas yog Vajtswv li, xwv kom nej thiaj

yuav raug nrhiav pom tsis muaj qhov
ceb nyob ntawm Khetos lub rooj
txiav txim.”⁶

Nws yeej zoo li no thiab yeej yuav
zoo li no mus txog thaum hnuv uas
Khetos Nws tus kheej yuav tswj kav
nyob hauv lub ntiaj teb.

Yog ib qho tu siab uas ib txhia tau
ntog vim tib neeg ua yuam kev. Tiam
sis txawm muaj li no los, qhov tseeb
mus ib txhis ntawm txoj moo zoo uas
nyob hauv Yexus Khetos lub Koom
Txoos ntawm Tsoom Haiv Neeg
Ntseeg hauv Hnuv Nyooog Kawg yeej
yuav tsis ploj mus zuj zus los sis raug
puas tsuaj.

Vim kuv yog ib tug Thwj Tim
ntawm tus Tswv Yexus Khetos thiab
vim kuv tau pom tej kev sab laj thiab
tej hauj lwm ntawm lub Koom Txoos,
kuv ua tim khawv hais tias tsis muaj
ib qhov kev xiaiv txim tseem ceeb uas
yuav hloov lub Koom Txoos no thiab
cov ntseeg uas tsis tau mob siab nrhiav
peb Leej Txiv Saum Ntuj Ceeb Tsheej
txoj kev tshoov siab thiab txoj kev coj
ua ntej. Nyov yog Yexus Khetos lub
Koom Txoos. Vajtswv yeej yuav tsis cia
Nws lub Koom Txoos mus deb ntawm
txoj kev uas Nws pom zoo.

Muaj Chaw Rau Nej

Rau nej cov uas tau ncaim ntawm
lub Koom Txoos mus, kuv hais rau
nej, kuv cov phooj ywg zoo, hais tias
muaj chaw rau nej nyob no.

Cia li los thiab muab nej tej txuj ci,
tej txiaj ntsim thiab lub zog koom ua
ke nrog peb li. Peb txhua tus yuav ua
neeg zoo dua vim nej ua li ntawd.

*Tej tug yuav nug hais tias, “Kuv tej
kev ua xyem xyav nev?”*

Tib neeg ib txwm muaj tej lus
nug—ntawm zaus lub txiv ntoo qheb
ntawm kev ua siab ncaj nrhiav qhov
tseeb tau loj hlob tuaj los ua ib tug
ntoo qheb ntawm kev to taub. Cov
mej zeej ntawm lub Koom Txoos
feem coob tau muaj ob peb lub sij
hawm thaum lawv xav xav txog tej
lus nug tseem ceeb. Ib lub hom phiaj
ntawm lub Koom Txoos yog kom tib
neeg cog thiab tu ib lub noob ntawm
txoj kev ntseeg—txawm yog yuav

tsum cog lub noob ntawd nyob hauv
cov av ntawm kev ua xyem xyav
thiab tsis paub tseeb. Kev ntseeg yog
kev cia siab rau tej yam uas peb tsis
pom tiam sis muaj tseeb.⁷

§Yog li ntawd, kuv cov kwv tij
thiab cov muam—kuv cov phooj ywg
zoo—kuv thov nej, ua xyem xyav
txog tej yam nej tsis paub tseeb ua
ntej nej ua xyem xyav txog nej txoj
kev ntseeg.⁸ Peb yeej yuav tsum tsis
txhob cia peb tej kev ua xyem xyav
ntes peb thiab cia peb tsis txais kev
hlub, kev kaj siab lug, thiab tej txiaj
ntsim uas los ntawm kev ntseeg tus
Tswv Yexus Khetos.

*Tej tug neeg yuav hais tias, “Kuv
tsis sib haum nrog nej cov neeg nyob
hauv lub Koom Txoos.”*

Yog tias nej muaj peev xwm saib
nyob hauv peb lub siab, tej zaum nej
yuav paub tias nej sib haum nrog peb
zoo dua li nej xav. Nej yuav xav tsis
thoob hais tias peb muaj tej kev xav
tau thiab tej kev nyuaj siab thiab kev
cia siab zoo ib yam li nej. Tej zaum
nej yuav xav tias nej lub neej dhau los
yeej txawv ntawm Haiv Neeg Ntseeg
feem ntau, tiam sis tej zaum qhov
ntawd yog ib qho koob hmoov. Cov
kwv tij thiab cov muam, cov phooj
ywg, peb xav tau nej tej txuj ci thiab
nej tej kev xav. Qhov uas muaj tib
neeg sib txawv nyob thoob plaws lub
ntiaj teb yog kev dag zog ntawm lub
Koom Txoos no.

*Tej zaum ib txhia yuav hais tias,
“Kuv tsis xav tias kuv muaj peev xwm
ua raws li nej tej kev cai.”*

Ces cia li los xwb! Tus Tswv twb
tsa lub Koom Txoos kom tu cov neeg
tsis zoo tag nrho, cov nyuaj siab,
thiab cov qaug zog. Muaj tib neeg
uas *xav xav* ua raws li cov lus txib
kawg siab kawg ntsaws, txawm yog
lawv tseem tsis tau ua li ntawd *zoo
tag nrho*.

*Ib txhia yuav hais tias, “Kuv paub
ib tug mej zeej ntawm nej lub Koom
Txoos uas siab dag. Kuv yeej yuav tsis
koom ib lub koom txoos uas muaj ib
tug zoo li no ua ib tug mej zeej..”*

Yog tias nej xav tias tus neeg *siab
dag* yog ib tug uas tsis ua raws nraim

li nws ntseeg txhua lub sij hawm,
ces peb txhua tus yog neeg siab dag.
Tsis muaj leej twg uas zoo ib yam li
Yexus Khetos zoo li peb paub peb
yuav tsum ua. Tiam sis peb mob siab
xav kov yeej peb tej kev ua yuam kev
thiab tej kev xav ua txhaum. Peb xav
ua zoo dua ntxiv kawg siab kawg
ntsws nrog Yexus Khetos txoj Kev
Theej Txhoj txoj kev pab.

Yog tias nej xav ua li no, ces
txawm yog nej raug xwm txheej dab
tsi, txawm nej zaj keeb kwv zoo li
cas los, los sis nej zaj lus tim khawv
muaj zog npaum li cas los, yeej muaj
chaw nyob hauv lub Koom Txoos no.
Los, koom nrog peb!

Los, Koom Nrog Peb!

Txawm peb ua yuam kev los, kuv
paub tias nej yuav ntsib cov neeg
zoo tshaj plaws nyob thoob plaws
lub ntiaj teb no nyob hauv cov mej
zeej ntawm lub Koom Txoos no.
Yexus Khetos lub Koom Txoos yeej
muaj cov neeg siab dawb siab zoo,
siab ncaj thiab cov uas mob siab
heev.

Yog nej xav tias nej yuav nrhiav
tau tib neeg zoo tag nrho nyob no,
nej yuav poob siab. Tiam sis yog nej
nrhiav Khetos txoj lus qhuab qhia,
Vajtswv txoj lus “uas kho neeg txoj
kev nyuaj siab,”⁹ thiab tus Vaj Ntsuj
Plig Dawb Huv txoj kev ua kom
neeg dawb huv, ces nej yuav nrhiav
tau tej ntawd nyob no. Nyob hauv
lub caij nyoog uas tib neeg txoj kev
ntseeg ploj zuj zus—nyob hauv lub
caij nyoog uas tib neeg ntau xav tias
lawv nyob deb ntawm lub ntuj ceeb
tsheej—nej yuav nrhiav tau ib co
neeg uas xav paub thiab xav nyob
ze dua lawv tus Cawm Seej thiab xav
ua hauj lwm pab Vajtswv thiab lawv
cov neeg, ib yam li nej. Los, koom
nrog peb!

Nej Yuav Tso Kuv Tseg Thiab Los?

Ua rau kuv nco txog ib lub sij
hawm nyob hauv tus Cawm Seej lub
nej thaum tib neeg coob tau tso Nws
tseg.¹⁰ Yexus nug Nws kaum ob tug
thwj tim tias:

“Nej yuav tso kuv tseg thiab los?
“Ximoos Petus teb Yexus hais tias,
Tus tswv, yog peb tso koj tseg, peb
yuav mus cuag leej twg? Koj tej lus
pub tau txoj sia ib txhis rau neeg.”¹¹

Muaj tej lub sij hawm thaum peb
yuav tsum teb lo lus nug no. Peb
puas yuav tso nws tseg thiab los? Los
yog, zoo li Petus, peb puas yuav ua
raws li cov lus ntawm txoj sia nyob
mus ib txhis?

Yog nej nrhiav qhov tseeb, lub
ntsiab, thiab ib txoj kev kom muab
siab rau ntseeg; yog nej nrhiav ib qho
chaw rau nej: Los, koom nrog peb!

Yog tias nej tau tso kev ntseeg tseg:
Cia li rov qab los. Koom nrog peb!

Yog nej raug ntxias kom muab tso
tseg: Cia li nyob ntev me ntsis ntxiv.
Yeej muaj chaw rau nej nyob no.

Kuv thov kom nej txhua tus uas
hnov los sis nyeem cov lus no: Los,
koom nrog peb. Cia li los ua raws li
Khetos uas muaj siab zoo txoj kev hu.
Kwv nej tus ntoo khaub lig thiab nrog
Nws mus.¹²

Los, koom nrog peb! Vim nyob no
nej yuav nrhiav tau qhov uas muaj
nqi tshaj txhua yam.

Kuv ua tim khawv hais tias nej
yuav nrhiav tau tej lus ntawm txoj sia
nyob mus ib txhis, kev cog lus tias
yuav txais kev txhiv dim, thiab txoj
kev kaj siab lug thiab kev zoo siab.

Kuv rau siab thov Vajtswv hais tias
nej txoj kev nrhiav qhov tseeb yuav
tshoov nej lub siab kom nej xav los
thiab koom nrog peb. Los ntawm
Yexus Khetos lub npe dawb ceev,
amees.

LUS CIM

1. Saib Mathais 16:18–19; Hilamas 10:7.
2. Saib Lus Qhuab Qhia thiab Kev Khi Lus 84:20.
3. Saib 2 Nifais 33:10.
4. Saib “Have I Done Any Good?” *Hymns*, naj npawb 223.
5. Saib Tej Nqe Kev Ntseeg 1:11.
6. Phab ntawv qhia npe ntawm Phau Ntawv Maumoos Maumoos; saib Maumoos 8:17.
7. Saib Henplais 11:1; Amas 32:21.
8. Saib F. F. Bosworth, *Christ the Healer* (1924), 23.
9. Yakhauj 2:8.
10. Saib Yauhas 6:66.
11. Yauhas 6:67–68.
12. Saib Mathais 16:24.

© 2013 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub txhais ua lus As Kiv : 6/13. Pub txhais ua lus Hmoob: 6/13. Kev txhais lus *Visiting Teaching Message*, November 2013. Hmong. 10671 295